

San Judas chũ'o tocha saosi'ea'me

Dios chẽacojñosinare Judas tocha saosi'ea'me

¹ Chũ'u, Judas, Santiago cho'jeuji, Jesucristo chũ'ũñe cho'okaikũji mũsanũkonare ija'ovana ie chũ'o tocha saomu, mai Ja'ku Diopi oiũ chẽa paakũna Jesucristo cu'ache ãsekaicojñonare.

² Diopi mũsanũkonare chiiũ oiũ rekoñoãna re'oja'che pa'iche karama'ñe ãsikũ paau.

Jorechũ'o che'chona pa'iche'me

³ Asarepajũ'u, chũ'u majarpãijana chũ'u cuasana. Mũsanũkonare Dios re'oja'che pa'iche jo'kasi'ena'me Repau maire vati toa saoche ãsekaiche'te kũakũ rua tocha saouache cuasaku pa'isi'kua'mũ chũ'u mũsanũkonare. Jã'ata'ni chura chekere kũakũ chũ'vachũ'ore tocha saoche pa'imũ chũ'ure, mũsanũkonapi Diore masi cuasache'te peore cho'ore'ochetũ'ka cho'oju cuasaju maire Repau neenare jo'kasi'ere ũcua cuasaju paarpũ chini.

⁴ Pãipi rua joremasinapi te'ena mũsanũkonani ja'me jovo chi'ijũna, jã'aja'ñe kũakũ tochache pa'imũ chũ'ure, Dios chũ'o pa'ikorovu aperũmũ, "Repana cu'ache cho'osi'e ro'ijanaa'me", chiiche tocha kũacojñosinapi mũsanũkonani ja'me pa'ijũna. Cu'anajeju ija'che chũ'vame repana: "Mai Cuasakũji Diopi maini oiũ cu'ache cho'oche cuasamaũna ũcuauache cu'ache

cho'oto re'omu", chiiju chu'vaju Maire Paaku'te Jesucristo'te Mai Aire jachaju pa'inaa'me repana.

5 Ie ũcuare masinareta'ni mʉsanʉkonapi cuasaju che'chea'ju chini kuara chiimu chu'u: Maire Paaku Dios Israelpai Egipto cheja pa'isinare etua ra Repau chu'ũñe asa jachaju cuasamanare pai peochejana jūnisōñe chu'ũasomu.

6 Ūcuachi'a ángeles te'enare Repau chu'ũ jo'kasi'ere pa'icuheju repanare uachechi'a pañu chiiju Repau pa'icheja eto si'arumu chijacheja pa'ichejana chea quēo suo paacheja'che paamu Dios repanare, ũcuauko cho'osi'e ro'iche Repau chu'ũumucusejatuka.

7 Aperumu pa'isina Sodoma vu'ejoopo canana'me Gomorra vu'ejoopo pa'ina repajoopoã kueñe cajoopoã pa'inana'me cho'ocojñosi'e ũcuachi'a cuasaju'u. Repana pa'imanare ũcuauanare ja'me kaiju, umupai ũcuajanare umuneju ũcuachi'a romi ũcuajanare romineju cheke si'ache cu'a cho'ojū pa'ijuna Dios repanani pe'rukū sējokū cho'ouna toa chachama'ñe uutoapi tuāni uosōasomu, repana cu'ache cho'osi'e ro'i. Jā'aja'ñe cho'oasomu Dios maipi repana cho'ocojñosi'ere cuasa kuku cu'ache cho'oma'ñe pa'iju re'oja'chere cho'ojū che'chea'ju chini.

8 Repana, mʉsanʉkona pa'icheja pa'ina, cu'ache che'chona ũcuaja'che repana uo kāni ñañechi'are che'choju repana ca'nivūpi cu'ache cho'ojū, Maire Paaku chu'ũñejē'e jachaju cuheju, cūnaumu pa'iju

chũ'unare ñomanarejẽ'e vajuchũma'ñe cu'ache cutunaa'me.

⁹ Angeles chũ'ũkuta'ni Miguel, repau Moiseni tãra chini vati aina'me cavarũmu, repauni vajuchũku cu'ache i'kama'ñe, "Diopi mũ'u cu'ache cho'osi'e ro'i chũ'ũa'ku", chiniasomu repau'te.

¹⁰ Repana jorechũ'o che'chonata'ni repana ñamamajñarũãna'me ñamanare cu'ache i'kanaa'me. "Rũa masinaa'me chũkũna", chiinata'ni cu'ava'na masichechi'a masinaa'me. Repana masichechi'a cho'oju si'arũmu na'a rũa cu'ache cho'oju cho'osõju pa'ime repana.

¹¹ Repanapi Caín pa'isi'ejache pa'iju chekũnarejẽ'e cuasama'ñe cu'are cho'oju na Diopi chũ'ũna rũa chũova'nare cu'ache ti'jñeja'mu repanare. Ũcuachi'a kurire kooñu chini Balaam cho'osi'ejache cu'are ũcuauache cho'oju pa'ime. Ũcuachi'a Coré cho'osi'ejache Dioní jachaju cho'osõjanaa'me repana, jachache ro'i.

¹² Mũsanũkona chi'i sãĩñechi'a cuasaju pojoju ãu ãirũmu ja'me chi'i chekũnare jmakarũjẽ'e ña kũkũma'ñe vajuchũache ñoñe cho'oju rũa soju cono ũkũju ãu ãinaa'me repana. "Chekũnare pãi kuiranaa'me chũkũna", chiinata'ni repanachi'a meñe kuiranaa'me. Jã'aja'ñe cho'oju oko rara chini rama'ñe tuta saochaja'che jorenaa'me repana. Ũcuachi'a sũkiñũã repañũã ãiñe kũirũmu tí'ato kũimañũãja'ñe pa'ime. Saivũãre ruta ũharena jũnisõsiñũãja'ñe pa'ime repana.

13 Ûcuachi'a repana cu'ache cuasache chichajaji fa'akuna sui'rika rúa meno jiricheja'che rúa i'kajũ vajuchũache cho'o ñojũ pa'inaa'me repana. Ma'jñoko repana ku'ima'ña saijũ cavesusõ tĩñe saicheja'che cu'ache pa'ijũ Diopi chũ'una rúa chijachejare ai sani pa'ijanaa'me repana.

14 Ûcuachi'a Enoc Adán majanajeũ mamakũ majanajeũ chĩ pa'isi'kũ Dios chũ'ore kuakaiũ repana jorena cho'ocojñojañe ija'che kuakũ i'kaasomũ: “Diore Repaũ neena ángeles rúa jainukona'me raiũna ñamũ chũ'ũ.

15 Pãi Ûcuanũko cho'osi'ere ro'iche chũ'ura chini raimũ. Cu'anani repana cu'ache cho'osi'e ro'i, Ûcuachi'a cu'anajejũ Repaũni jachajũ cuhejũ cu'ache i'kasi'e ro'ia'jũ chini chũ'ura chini raimũ Repaũ”, chiniasomũ repaũ Enoc.

16 Repana jorena si'arumũ ke'rechechi'a pa'ijũ, cu'ache i'kajũ repanare uachechi'a cu'ache cuasanaa'me. Repana pa'ichechi'a meñe i'kajũ pojonapi, chekunare Ûcuanani re'oja'che cho'okaapũ chini jorejũ re'oja'cheja'che i'kanaa'me repana.

Ñarepajũ pa'ijũ'ũ; jorenapi cacũ'oju

17 Jã'ata'ni mũsanukona chũ'ũ majapãijana chũ'ũ cuasana, asarepajũ'ũ. Maire Paakũ Jesucristo saosina mũsanukonare kuasi'e cuasajũ'ũ, ija'che i'kasi'e:

18 “Na'a pa'isirumũ Jesucristo chuta'a jo'e raimarumũ pãi mũsanukonana'me pa'ina Repaũ'te masi cuasamanajejũ pãisojanaa'me

musanukonare, repanare uachechi'a cu'ache cho'ojũ pa'inajeju", chiisinaa'me.

19 Jã'aja'ñe i'kacojñosina musanukonana'me pa'ina jorena ũcuanaa'me. Jesure cuasamana pa'iche pa'ijũ Dios Rekocho'te peojũ ũcuache cho'ojũ cacũ'ojuna pãi te'ekuanuchi'a kuñusõju pa'ime.

20 Jã'ata'ni musanukona chu'u majapãijana chu'u cuasana, asarepajũ'u. Musanukona cuasache'te Dios chu'o na'a rũa che'cheju masi rũhiñe pa'ijũ'u. Ũcuachi'a Dios Rekocho kuache'te sêeju pa'ijũ'u Repau'te.

21 Dios maire oiche'te cavesuma'ñe cuasaju ũcuachi'a Maire Paaku Jesucristo maini oiu Dios pa'ichejana ai sajaumucusere cuasaju cha'aju pa'ijũ'u.

22 Masi cuasamanare oiju cho'okaijũ'u, masi cuasaa'ju.

23 Toana tuãnisõcuhana'ña cu'ache pa'inare tũseju chẽa kuñoñeja'ñe cho'okaijũ'u. Chekunare cu'ache cho'onare oiju repaña cho'oche ña ũseju repaña cho'ocheja'che cho'oma'ñe re'oja'chere che'choju pa'ijũ'u.

Dioni pojoku i'kasi'ea'me

24-25 Dios Ũcuate'euji Maire Paaku Jesucristo cho'okaisiejekuna maire vati toa sani uuche ũsekaikũji peore Masikũji cho'okaiuna Repau'te cuasache ũhasõma'ñe cuasaju re'oja'che pa'ijũ rũa pojojũ pa'ijanaa'me. Jã'ajekuna Repau'te cuasache ũhasõmaneni cu'ache peonapi Repau'te re'oja'che ñoku'te ti'jñeñe sani re'oja'che pa'ijanaa'me mai. Dios re'oja'che pa'iu,

Aijekũ Pãĩ Ũcuanũkore Paakũ, peore Masiũjekũ
chuta'a cheja peorũmũjẽ'e pa'iu irũmũjẽ'e pa'iu
si'arũmũ pa'ikũ'mũ Repaũ. Re'omũ.

Judas

Koreguaje
Koreguaje: Dios Chu'o Kuaphuro New Testament
copyright © 2009 Wycliffe Bible Translators, Inc.

Language: Koreguaje

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 30 Apr 2025 from source
files dated 1 May 2025
87a345ac-83c6-51ad-8750-17a703f38bcc